

Tgi è John Kerry?

El para da pudair batter Bush

DA GUIU SOBIELA-CAANITZ

■ **En ils Stadis unids (SU) tshertga la Partida democratica (PD) in candidat cun bunas vistas da batter George W. Bush en l'elecziun presidenziala dals 2 da november. En mintga stadi federativ sto la basa da la PD tsherner tranter quels umens che han s'annunziads per l'uffizi politic il pli pussant dal mund; candidatas na datti deploramain betg.** En ils emprims dus stadis han ins gist tschernì; triumfà en omadus ha senatur *John Forbes Kerry* (60 Onns), «JFK» sco John Fitzgerald Kennedy (1917–1963), quel anteriur president democratic ch'il giuven Kerry admirava zunt. Tenor las retschertgas momentanas pudess quest batter Bush. Ma tgi è John Kerry?

Expert da politica mundiala

Kerry è il num englais dal district irlandais Ciarrai, regiun catolica nua ch'il vegl linguatg celtic viva anc adina. Ma John Kerry na deriva betg da là. Ses tat patern, immigrant gidieu da l'Austria-Ungaria convertì al catolicissem, ha surpiglià in num da famiglia en armonia cun sia cardientscha nova. Il figl Richard, bab da John, era funcziunari dal ministeri da l'exteriur e diplomat t. a. a Berlin vest. «Las tshainas tar Kerry eran seminaris da politica exteriura. Auters mats tschanavan avant la televisiun, ma John discutava la ductrina da George Kennan [davart la resistenza a l'expansiun sovietica, G. S.-C.]» (1). La mamma da John derivava da Massachusetts, in da quels stadis atlantics che han fundà la federaziun 1777; in babun, l'Englais John Winthrop (1588–1649), è stà



John Kerry ha fatg surstar en il combat electoral fin uss.

KEYSTONE

l'emprim guvernatur da quella colonia puritana. John Kerry ha frequentà in internat svizzer; las biografias na din betg tgenin, ma i constat ch'el posseda il linguatg franzos e s'orientava cun chartas fluvialas franzosas durant ses temp da guerra sco litinent da marina en Viêt-Nam, anteriura colonia da Frantscha. 1982 è'l vegnì elegì vicegubernatur da Massachusetts; dapi 1984 è'l senatur da lez stadi (6,5 milliuns olmas), in center cultural dals SU cun las universitads da Boston e cun quella da Harvard. En il senat ha Kerry «s'acquistà gronda stima

sco commember da pliras cumissions d'inquisiziun ed expert per la politica da segirtad» (2). El ha maridà Teresa Heinz, da derivanza portugaisa, vaiva ed ertavla dal retg dal «ketchup».

Il pievel sa senta malsegir

Ma pertge insumma ha Kerry triumfà en duas elecziuns preliminaras encunter quel Howard Dean, anteriur guvernatur da Vermont, che tuts resguardavan sco victur segir? Domadus vulan che Bush bandunia la Chasa alva per adina la notg da Silvester; quai vul l'entira PD. Ma

Dean na para betg d'avair chapì uschè bain sco Kerry ch'ils attentats nunditgs dals 11 da settember 2001, purtond la guerra aifer ils cunfins da la superpusanza, han dà a blers Americans dals SU il sentiment d'esser oramai exposts ad attatgas incalculablas ed irresistiblas. Bush ha enclieg lez sentiment, ma cumbatta il privel a moda nunadattada. Dean n'ha nagina esperienza militar. Kerry è turnà da Viêt-Nam cun pliras decoraziuns; lura ha'l sa mess a la testa dal moviment da pasch. El po guardar da surengiu sin Bush che n'ha mai fatg guerra ed enconuscha strusch il mund ordaifer ils SU. Ils 25 da schaner en il cumbat electoral ha Kerry declarà: «Il mund as guarda. Vus na tschernis betg mo il president dals SU, mabain er il manader dal mund liber. Nus n'astgain betg ans prestar quatter onns dapli cun Bush» (3). Per il mument para Kerry l'unic candidat abel da batter Bush; el unescha il program social da la PD cun ina visiun globala da las dumondas da segirtad. Kerry: «Nus essan l'unic pajais sviluppa nua che l'assicuranza da malsauns è reservada per ils ritgs. 43 milliuns Americans n'han nagina» (4). Gist la segunda elecziun preliminar, quella da New Hampshire, ha fatg smirvegliar per la ferma participaziun che cumprovava il giavisch fervent da vieuta. Quai po midar; nov mais ans separan anc dals 2 da november. En favrer duai Kerry far campagna t. a. en plis stadis dal Sid, nua ch'il clima politic è vaira different; quai vegn a favorisar dus concurrents da là, senatur John Edwards (Carolina dal nord) e l'antierur general Wesley Clark (Arkansas). Dentant vegn Kerry segir a procurar ch'ins na l'emblidia betg.